



W. R.
21800



Digitized by the Internet Archive
in 2010 with funding from
University of Ottawa

ARREST NOTABLE DE LA

Cour de Parlement;

SVR CESTE QUESTION,

SÇAVOIR,

*Si celuy est capable de succeder, qui a esté en la
Compagnie des Iesuites, demeurant & por-
tant l'habit & le nom de Iesuite, & y ayant
apres deux ans de probation fait vœu de
Pauvreté, Chasteté, & Obedience perpe-
tuelle.*



A PARIS,

Chez JEAN BRUNET, rue neufue S. Louys, pres le
Pont Sainct Michel, au Trois de Chiffre.

M. DC. XXXI.

ARREST WARRANT

State of New York

County of New York

IN SENATE

January 10, 1880

That the following named persons

are guilty of the crime of

Robbery

and are hereby

arrested

by the Sheriff of the County of New York

and the undersigned

Magistrate

do hereby certify

that the above named persons

are guilty of the crime of



Extraict des Registres de Parlement.



N T R E René Fauerot Maistre Orfebure demeurant à Bar-sur-Aube, au nom, & comme pere & tuteur des enfans mineurs de luy & de defuncte Ieanne Varney sa femme, demandeur en lettres en forme de Requeste ciuile, du 4. Aoust 1629. & lettres d'ampliation du 10. Auiril 1630. contre l'Arrest du 24. Mars 1619. & appellant de la Sentence donnée par le Bailly de Chaumont ou son Lieutenant, le 16. Mars 1627. & d'autre precedente renduë par le Preuost de Bar-sur-Aube ou son Lieutenant, le 4. Decembre 1626. & de tout ce qui s'en est ensuiuy au preiudice desdits mineurs, d'une part; Et Maistre Charles Begat, Prestre, soy disant Docteur en Theologie, defendeur, & inthimé, d'autre; Et encores Laurent Gallée, demandeur en requeste d'interuention du 19. Mars 1630. & lettres de subrogation aux droicts dudit Begat, du 21. dudit mois de Mars, en vertu d'un pretendu contract de vente à luy faite le 7. dudit mois aussi d'une part: Et ledit Fauerot, audit nom, defendeur d'autre, sans que les qualitez puissent preiudicier, apres que L A B B E' aduocat pour le demandeur, defendeur, & appellant, &

TALON aduocat pour Begat, defendeur & in-
 thimé, & Laurent Gallée demandeur en reque-
 ste d'interuention & lettres de subrogation ont
 esté ouys: Et que LABBE' a cōclud à ce qu'il soit
 restitué contre l'Arrest du 24. Mars 1629. par
 lequel, nonobstant que le defendeur ait fait les
 vœuz de religion, pauureté, chasteté, & obe-
 diance perpetuelle en la société des Iesuites,
 apres deux ans de probation, & qu'il y ait de-
 meuré apres y auoir fait les vœuz portant l'ha-
 bit & le nom de Iesuite depuis 1617. iusques en
 1623. il a esté receu à succeder à vn sien frere
 souz pretexte d'un congé à luy baillé par ceux
 de ceste Société, & dit pour ces moyens que le
 procès a esté iugé contre des mineurs non de-
 fendus, leurs principales defenses ayant esté ob-
 mises, en ce que le defendeur ayant desnié que
 les vœuz par luy faicts fussent obligatoires, &
 soustenu que ce n'estoient vœuz de Religion,
 ains simples vœuz & promesses verbales, il n'a
 esté produit les Statuts & Bulles de Iesuites
 qu'ils ont fait imprimer en leur College à Ro-
 me, par lesquelles se voit que tels vœuz, quoy
 que qualifiez simples sont vœuz substanciels de
 Religion, *Verè substantialia Religionis vota et-
 si simplicia*: Et que ceux qui les ont faicts apres
 deux ans de probation sont veritablement &
 proprement Religieux, tout ainsi que les Reli-
 gieux Profez, tant de ceste Société que des au-
 tres ordres Reguliers quels qu'ils soient, *Verè*

& propriè Religiosi non secus atque ipsitum Societatis tum quorumlibet aliorum Regularium ordinum professi : Ce sont les termes d'une des Bulles par eux obtenues du Pape Gregoire XIII. qui commence *Ascendente Domino* : Et qu'il ne peut servir audit Begat, de dire qu'il n'a fait le dernier vœu de ladite Societé qu'ils appellent solennel, parce qu'il se voit aussi par les propres termes de leurs Statuts qu'ils peuvent estre congédiez apres le dernier de leurs vœux aussi bien qu'apres le premier, *In quibusdam casibus etiam professi cuiuscunque gradus & dignitatis in Societate sint, dimitti possent*, ce sont les termes de leurs Statuts en la partie 2. chapitre 1. page 74. de l'Edition faite en leur College à Rome en l'an 1583. & peu auparavant page 73. *Quamvis causas ad dimissionem dignas eo grauiores esse oportet quous arctius Societatis corpori coniunctus est quantumlibet tamen quisque sit coniunctus, in quibusdam casibus separari ab ea posset ac deberet* : Qu'il n'a pas mesme esté produit la Coustume de Chaumont dans le ressort de laquelle les biens sont assis, & les parties demeurantes, qui porte que tous Religieux profez ne peuuent succeder, ny le Monastere pour eux, & n'a pas non plus esté remonstré & prouué comme il estoit nécessaire pour bien defendre ses mineurs que par les maximes de ceux de la societé des Iesuites, ainsi que par le droit Canon le vœu de chasteté quoy que simple, empesche de se pou-

uoir marier; que ceux de ceste Societé font par
 mesme moyen en mesme temps & par mesmes
 paroles vœu de pauvreté ainsi que de chasteté;
 que tout ainsi que le vœu de chasteté les empes-
 che de se pouuoir marier, quoy que par eux qua-
 lifié simple, aussi le vœu de pauvreté les doit
 empescher de succeder, l'un & l'autre estans
 vouëz & promis à Dieu en mesme temps & par
 mesmes paroles, & l'un qualifié par eux vœu
 simple, ainsi que l'autre, la formule de ce vœu
 estât en ces termes, *Omnipotens sempiterna Deus,*
Ego N. voueo coram sacratissima Virgine Maria &
curia tua cœlesti vniuersa; diuina maiestati tue pau-
pertatem, castitatem, & obedientiam perpetuam in
Societate IESV, partie 5. chapitre 4. page 191. que
 le dernier de leur vœu pour ce qui est de la pau-
 vreté, chasteté & obediēce perpetuelle est sem-
 blable au premier, la formule estant en ces ter-
 mes, *Ego professionem facio & promitto omnipoten-*
ti Deo coram eius Virgine matre, & vniuersa Curia
cœlesti & tibi reuerendo patri Societatis IESV prepo-
sito generali locum Dei tenenti, perpetuam pauper-
tatem, castitatem & obedientiam; que ce sont ver-
 ba de presenti, non point verba de futuro; que *vo-*
ueo, professionem facio, promitto, signifie le mesme;
 que si l'un doit plus signifier que l'autre, ce doit
 estre le premier, qui est *voueo*, comme estant le
 propre terme de Theologie pour denoter les
 vœuz, que ce que nous appellons promesse à
 l'esgard des hommes, nous le disons vœu à l'es-

gard de Dieu ; qu'il doit suffire à ceux de ceste
 Societé de faire valoir entr'eux, & en leur parti-
 culier ce qui est de leurs Statuts & Bulles, de
 faire pour ce qui est du spirituel ce que portent
 leurs Statuts & Bulles, mais qu'ils ne doiuent
 rien faire ny mesme entreprendre contre ce qui
 est des loix publiques, du droit commun, des
 loix faites pour le temporel obseruées de tout
 temps en France, pour la conseruation & ma-
 nutation des familles sans lesquelles l'Estat ne
 peut subsister, entre lesquelles loix l'une des
 principales & plus necessaires en ce temps est
 celle-cy ; Religieux ne succede ne le Monaste-
 re pour eux, laquelle ils renuerseroient & ren-
 droient sans effect non seulement en l'une de
 ses parties, mais en toutes les deux toutesfois &
 quantes qu'ils voudroient si leur congé pou-
 uoit operer ce que le defendeur pretend : Et
 outre que le procès a esté iugé sur piece contre
 laquelle il n'a esté formé inscription de faux,
 quoy qu'elle soit fausse, & en sa substance pour
 contenir le contraire à deux certificats baillez
 par le Pere Boniel, & aux Statuts & Bulles de
 ceux de ceste Societé, & mesme à l'interrogatoi-
 re de Begat, & en sa datte pour estre l'une des
 copies dattée du 7. Aueil & l'autre du 7. de Mars
 1627. & mesme contient vne contradiction ma-
 nifeste qui l'a rend nulle, de nul effect & va-
 leur, suiuant les loix touchant les contradietiōs ;
 que la fausseté est si manifeste, que le defendeur

ne veut représenter l'original de la piece, pourquoy sa partie n'a fourny ses moyens de faux ne les pouuant pas fournir sans voir l'original, & par ainsi qu'ils ne peuuent pas auoir esté ioincts comme le defendeur veut dire; que la suppression que le defendeur fait encores de l'original de ceste piece est suffisante pour la faire tenir pour fausse, & faire reuoquer le iugement fondé sur icelle, que telle est la disposition des loix & des plus celebres Docteurs, entr'autres de Cujas en ses paratitres sur le tiltre du Code *Si ex falsis instrumentis*, & de du Moulin en son commentaire sur la Coustume de Paris §. 8. nombre 60. De plus que quand la piece seroit vraye, le defendeur ayant fait vœu substantiel de Religion apres deux ans de probation en la dite Societé, & y estant demeuré depuis 1617. iusques en 1623. portant l'habit & le nom de Iesuite, y ayant mesme reïteré & renouvelé ses vœux deux fois par chacune année, il doit estre tenu & réputé Profez, à l'effect, entr'autres, de ne pouuoir recueillir, prendre, ny apprehender aucune succession, d'estre inhabile, incapable, & non receuable à succeder; que par l'article 6. de l'Edict du Rappel de ceux de ceste Societé, il est dit qu'ils ne pourront prendre ny receuoir aucune succession non plus que les autres Religieux; Et que si la clause mise à la fin dudit article estoit entendue comme veut le defendeur, l'exception de la Regle aneantiroit entierement

la regle, & ne se pourroit trouuer aucune es-
 ce à laquelle la regle peust estre appliquée, d'au-
 tant qu'il ne faudroit qu'un escrit souz feing pri-
 ué, qu'ils appellēt congé, de l'un des superieurs
 de ceste societé pour renuerfer la regle en quel-
 que temps que ce fust; Que la Cour preuoyant
 & preiugeant bien la mauuaise interpretation
 que l'on vouldroit apporter & donner à ceste
 clause, a fait un arresté sur icelle, lors qu'apres
 plusieurs iussions elle a deliberé sur l'enregistre-
 ment de cet Edict, tant s'en faut qu'elle ait passé
 & receu ceste clause purement & simplement,
 ainsi que pretend ledit defendeur: que depuis
 cet Arrest la Cour a iugé conformémēt à la loy
 generale, Religieux ne succedent ny le Mona-
 stere pour eux; entr'autres par l'Arrest de du
 Cros donné le 14. Aoust 1626. Que ceste clau-
 se mesme ne porte pas qu'estant licentiez &
 congediez ils succederont & viendront à parta-
 ge; mais qu'elle porte qu'estans congediez, c'est
 à dire auparauant qu'auoir fait vœu substantiel
 de Religion, ils rentreront en leurs droicts, c'est
 à dire s'ils en ont, & il n'en ont point, s'ils ont fait
 vœu substantiel de Religion par la loy qui dit,
 Religieux profez ne succedēt: Qu'ils ne peuuēt
 auoir plus de droict ny de priuilege que tous les
 autres Ordres de Religieux lesquels ne peuuēt
 succeder, au contraire si quelqu'un d'entr'eux
 sort on le renuoye en son Conuent, & son Su-
 perieur est tenu de le reprendre, & s'il en fait

quelque refus il y est condamné par iustice: Qu'un ordre qui n'est que toleré, sa reception estant appointée au Conseil sur plusieurs oppositions y formées, par Arrest contradictoirement donné, ne doit auoir plus de pouuoir ny plus de priuilege que les autres Ordres qui sont receus de temps immemorial en ce Royaume: que ce qui est encore à remarquer pour la cause de ces mineurs, est que le defendeur entrant en ceste société a fait la promesse qui est prescrite par les Statuts de ceste société au chap. 4. de l'examen general, de delaisser promptement, & un an apres son entrée tous ses biens, & ne les pas donner à ses parens, en disant que le conseil Euāgelique ne porte pas *Da consanguineis*, donnez à vos parens, à ceux de vostre sang, de vostre famille; qu'il doit souffrir la mesme loy qu'il s'est prescrite, que ne voulant rien donner à ses parens il n'est pas raisonnable qu'il reçoie aucune chose d'eux, ny par consequent qu'il leur puisse succeder: Comme aussi dit que si l'Arrest subsistoit il y auroit contrariété d'Arrest, ayant esté iugé par autres precedens Arrests, entr'autres par celuy donné contre du Cros, que celuy qui a fait lescdits vœuz en ladite société n'est receuable à succeder; que du Cros n'auoit fait autres vœuz que ceux que le defendeur a faits, ny n'estoit sorti de ladite société autrement que le defendeur en est sorti: Et pareillement qu'il y auroit contrariété à la loy generale du Royau-

me, & à la loy de la Prouince où les biens sont assis, qui porte que Religieux profex ne succedent: que le defendeur est, *verè & propriè Religiosus, non secus atque ipsi professi tum societatis tum quorumlibet aliorum regularium Ordinum*, suiuant la Bulle *Ascendente Domino*, vrayement & proprement Religieux tout ainsi que les profex tât de ceste societé que des autres Ordres Regulariers quels qu'ils soiēt: Comme aussi dit qu'il n'a esté fait droict sur vne requeste présentée par le demandeur, quoy qu'il eust ainsi esté ordonné en respondant la requeste présentée par le demandeur: que le defendeur pour n'estre pas à present demeurant en l'vn des Colleges, ou en l'vne des maisons de ceste societé, il n'est pas moins Religieux principalement pour les effects ciuils, puis qu'il a fait vœu substancial de Religion, vœu de pauvreté, chasteté, & obediace perpetuelle, soit que la succession soit escheuë pendât qu'il a esté en ceste societé soit depuis qu'il en est sorti, soit qu'il soit sorti avec congé, soit sans congé, il s'agist tousiours de sçauoir si vn Religieux de l'ordre des Iesuites est capable ou incapable de succeder; que le tout reuient tousiours à ceste mesme question qui est de tres-grande consequence, ne regardant pas seulement ces mineurs, mais vne grande partie des familles de ce Royaume: que le defendeur n'a obtenu l'Arrest dont il se preuault qu'en circonuenant la Religion de la Cour:

que ne point produire des pieces decisives de l'affaire, iustificatiues de la verité du faict, comme sont lesdits Statuts & Bulles qui n'ont peu estre supplées estans de faict, & qu'il ne rapporte que pour prouuer ce qui est du faict non point pour iuger du droict, est vne obmission de defenses en cause de mineurs, de mesme que de recognoistre pour vraye vne piece qui est fausse, prendre vne copie pour l'original d'une piece comme on a fait par vne requeste employée pour contredicts contre ceste piece, prendre vn certificat d'un congé pour un congé, & le prendre comme estant datté de l'an 1623. au lieu qu'il n'est datté que de 1627. est tres-mal defendre des mineurs non seulement *in obmittendo*, mais aussi *in committendo*; que par ces moyens la Religion de la Cour a esté surprise: Et par ce que la sentence du Bailly de Chaumont & du Preuost de Bar-sur-Aube portent, qu'à faute de rapporter par le defendeur certificat valable de son congé il est déclaré incapable de succeder, & qu'en cause d'appel le defendeur ayant rapporté ledit pretendu congé, ou plustost le certificat du congé à luy baillé en 1627. quoy qu'il fust sorti en 1623. il n'a esté interiecté appel de ces sentences comme il deuoit estre pour conseruer à ces mineurs le bien dont il s'agit en foustenant la question generale, sçauoir est, qu'apres les vœux de pauvreté, chasteté, & obediencie perpetuelle faicts par ledit Be-

gat apres deux ans de probation, il ne peut succeder nō plus que se marier, il supplioit la Cour de le receuoir appellant de ses sentences, & tenir l'appel pour bien releué, que le default d'auoir interiecté & releué cet appel estoit vne obmission de defenses en cause de mineurs qui ne pouuoit estre desniée, & que faisant droict sur son appel pour ce chef, il fust dit qu'il a esté mal iugé, en emendant ledit Begat déclaré non receuable à succeder: que Laurent Gallée interuenant, & demandeur en lettres de subrogation, n'ayant droict que de Begat n'auoit point de droict, & partāt aussi non receuable. TALON au contraire dit, qu'il n'auoit pas à defendre vne Sentence, mais vn Arrest; que l'obmission de defenses n'est veritable; que le demandeur a allegué au procès tout ce qui s'est peu dire pour ces mineurs; que les Statuts des Iesuites s'ils eussent esté produits sont à son aduantage, & par iceux appert qu'ils ne sont tenus Religieux qu'apres le vœu solennel; & par certaine Bulle du Pape Grégoire XIII. le Superieur a pouuoir de dispenser de leurs vœuz: pour ses moyens de faux, qu'ils sont si foibles que la Cour les a ioincts; que le congé est signé du Prouincial; qu'il n'y a contrariété d'Arrest; que ceux qui luy ont esté communiquéz sont interuenus sur autres considerations, & entr'autres personnes; que la succession est escheuë depuis que le defendeur est sorti de ceste societé: autre chose

s'il estoit sorti apres la succession escheuë : que par l'Edict du reſtabliſſement de ceſte ſocietë, il eſt dit, qu'au cas que cy-apres ils fuſſent congediez & licentiez par la compagnie, ils pourront rentrer en leurs droicts ; que cet Edict eſt enregiſtré & doit eſtre obſeruë. Et ſur ce ſouſtenu le demandeur non receuable en ſes lettres, & conclud à ce qu'il en ſoit debouté avec l'amende & deſpens: Enſemble BIGNON pour le Procureur General du Roy, qui a dit que de verité ce qui eſt de plus conſiderable en la cauſe eſt la conſequence, que de tous les moyens alleguez il eſtime que le plus fort eſt l'obmiſſion de deſenſes en ce qu'il n'a eſté appellé de la Sentence donnée par le Bailly de Chaumont, par laquelle, faute de rapporter par le deſendeur vn congé valable par eſcrit de ceux de la ſocietë des Jeſuites & du Superieur, le deſendeur a eſté déclaré inhabile & incapable de ſucceder ; & qu'en cauſe d'appel le deſendeur ayant rapporté vn certificat ſigné du Pere Binet, Prouincial de ladite ſocietë, contenant la diſpence des trois vœuz par luy faiçts, en conſequence duquel certificat & diſpence, il pretend pouuoir ſucceder, on a iugé le procès, ſur lequel eſt interuenu l'Arreſt contre lequel on s'eſt pourueu, ſans conteſter la queſtion generale, ſçauoir ſi apres les trois vœuz faiçts par Begat il y a lieu de le recevoir à ſucceder: eſtime que cela ne ſe peut pas faire, & que le vœu de pauureté, chaſteté, &

obedience perpetuelle vne fois faict és mains du Superieur doit tenir toutes sortes de personnes pour Religieux profez ; & de pretendre le contraire , cela feroit d'une perilleuse consequence pour le public, estant necessaire de veiller pour la cōseruation des familles: C'est pourquoy adherent avec le demandeur , à ce qu'en remettant les parties en pareil estat, iugeant la question principale , Begat soit priué de la succession, dont est question. LA COUR ayant esgard aux lettres , & icelles entherinant , a remis & remet les parties en tel & semblable estat qu'elles estoient auparauant l' Arrest, a receu & reçoit la partie de LABBE' appellant de la Sentence donnée par le Bailly de Chaumont, l'a tenu & tient pour bien releué , & y faisant droict sans s'arrester au faux, Requête d'interuention dudit Gallée , & lettres de subrogation , a mis & met l'appellation & ce dont a esté appelé au neant, en emendant a déclaré & declare Begat non receuable à recueillir la succession de son frere , & en ce faisant a maintenu & gardé, maintient & garde le demandeur audit nom en la possession & ioüissance des biens d'icelle succession ; & neantmoins pour aucunes causes & considerations, ordonné que le defendeur ioüira par forme d'vsufruit du tiers des immeubles & heritages d'icelle succession par forme d'alimens, sans despens ny re-

stitution de fruiets. Faict en Parlement le trentiesme iour de Ianuier mil six cens trente-vn.

Signé,

LEVESQUE.

LOVIS PAR LA GRACE DE DIEV ROY DE FRANCE ET DE NAVARRE, Au premier des Huissiers de nostre Cour de Parlement, ou autre nostre Sergent sur ce requis, Salut; A la supplication de René Fauerot Maistre Orfebure demeurant à Bar-sur-Aube, au nom & comme pere & tuteur des enfans mineurs de luy & de defuncte Ieanne Varnay sa femme, Nous te mandons que l'Arrest de nostre-dite Cour de ce iour cy attaché souz le contre seal de nostre Chancellerie par luy obtenu contre Maistre Charles Begat, & Laurent Gallée, iceluy tu mettes à deuë & entiere execution selon sa forme & teneur: de ce faire te donnons pouoir. Donné à Paris en nostre Parlement, le trentiesme iour de Ianuier, l'an de grace mil six cens trente-vn. Et de nostre regne le vingt-vniesme.

Par la Chambre,

Signé,

RADIGVES.





